

Sarajevo, 29.03.2016 god.

INICIJATIVA : UVRŠTAVANJE USVAJANJE FINANSIJSKOG IZVJEŠTAJA JU STUDENTSKI CENTAR ZA 2014. i 2015. godinu NA IDUĆU SJEDNICU SKUPŠTINE KANTONA SARAJEVO

POSLANIK: MARIO VUKASOVIĆ

Inicijativa upućena : JU „Studentski centar“ Sarajevo, Vlada KS

Inicijativa :

- Ovo je peti mjesec u nizu kako se bavim problematikom Studentskog centra te pitanjem potencijalnog kriminala u toj ustanovi.
Drago mi je da su se nakon pet mjeseci neke stvari pokrenule te da se tužilaštvo uključilo u kompletnu priču i da su prvi pomaci već napravljeni no ono što zabrinjava jeste izostanak bilo kakve reakcije od strane Vlade KS.
Vlada KS je prije tri mjeseca imenovala vd upravni i nadzorni odbor u ovoj ustanovi, i taj upravni i nadzorni odbor za ova tri mjeseca nije učinio apsolutno ništa a mandat im je istekao. Niti je imenovan novi direktor, niti nam je dostavljen finansijski izvještaj a podsjećamo da još uvijek nismo dobili ni finansijski izvještaj za 2014. godinu. Sve ovo nam govori da očito postoje centri moći koji žele ostanak ovakvog direktora.
U međuvremenu se uposlenici Studentskog centra primoravaju da potpisuju podršku direktoru pod prijetnjom otkaza, svakodnevno trpe mobing, poziva ih se na informativne razgovore a studente koji su se usudili usprotiviti direktoru odstranju iz domova.
Ovim putem podnosim incijativu da se na iduću sjednicu Skupštine KS uvrsti usvajanje finansijskih izvještaja i apelujem na Vladu da odmah na idućoj sjednici Vlade imenuje novi vd upravni i nadzorni odbor i pokrene smjenu direktora Kadrića. Molim vas da ne budete samo nijemi posmatrač. Direktor je već 16 godina na toj poziciji i svih 16 godina je u minusu a ukupan dug koji je napravio iznosi između 6 i 7 miliona KM.
Ako samo ovo nije dovoljan razlog za smjenu, ja ne znam stvarno šta jeste.

Dok domovi propadaju, direktor gradi teniske terene u iznosu od skoro 200.000 KM a da za njih nema građevinsku i urbanističku saglanost te nema dozvolu Vlade KS koju ju je morao pribaviti. Ovdje se radi o tipičnom primjeru nedomaćinskog upravljanja jednom ustanovom. Vrše se gotovinske isplate sa blagajne Studentskog servisa, što se lako može provjeriti a što je također zabranjeno raditi i ovdje se radi o iznosima od više stotina hiljada KM godišnje. Zamolio bih za pismeni odgovor na tražena pitanja i inicijativu ali bih isto tako zamolio premijera da nas izvjesti usmeno šta Vlada namjerava uraditi po ovom pitanju.
I s obzirom da nam nije dostavljeno prošli put, ponovo tražim da nam se dostavi spisak imena i prezimena svih studenata koji su radili i rade u Studentskom centru a koji su prijavljeni preko Studentskog servisa. Također molim da nam se dostavi i osnivački akt servisa te ovaj put molim Vladu KS da oni to učine te proslijede nama.